

07/12/1997

OIC tidak tepati harapan ummah

KUALA LUMPUR: Perdana Menteri Datuk Seri Dr Mahathir Mohamad yang akan menghadiri sidang kemuncak Pertubuhan Persidangan Islam (OIC) di Teheran minggu depan berkata, OIC tidak seperti yang diharapkan dan perlu melakukan banyak lagi berbanding apa yang ia sudah lakukan untuk memperkukuhkan perpaduan di kalangan negara Islam.

Beliau berkata, negara Islam perlu mengetepikan perbezaan pendapat di antara mereka, menunjukkan toleransi dan persefahaman yang lebih lagi seperti yang diminta oleh umat Islam di seluruh dunia.

"Banyak yang boleh dilakukan oleh OIC berbanding apa yang sudah dilakukannya sebelum ini. Malangnya, ia tidak menepati harapan ummah," katanya dalam temu bual dengan Agensi Berita Republik Islam Iran (IRNA) sempena sidang kemuncak OIC dari 9 hingga 11 Disember ini.

Dalam hal ini, Dr Mahathir berkata kajian semula fungsi OIC disambut baik dan menambah: "Saya percaya ia boleh melaksanakan fungsi yang lebih besar dan menjadi pertubuhan yang lebih kukuh lagi."

OIC adalah forum penting bagi hal ehwal berkaitan Islam dan perpaduan. Malaysia adalah antara 25 negara pengasas OIC pada 1969.

Keanggotaan berkembang kepada 55 negara dan fokus sebelumnya dalam isu politik diperluaskan kepada kerjasama ekonomi.

Ditanya sama ada Malaysia akan menyokong pengurangan belanjawan sekretariat OIC di Jeddah, Perdana Menteri berkata:

"Jika anda membelanjakan wang dan menunjukkan hasil, kita tidak kisah membayar lebih banyak lagi. Tetapi jika anda tidak menunjukkan hasil, saya rasa sia-sia berbelanja begitu banyak,".

Belanjawan tahunan sebanyak AS\$10.5 juta setahun diperuntukkan bagi sekretariat OIC, dengan Malaysia menyumbangkan 3.5 peratus daripada jumlah itu.

Beliau berkata, Malaysia akan mendengar pendapat anggota lain mengenai perkara itu.

Ditanya sama ada idea Pasaran Bersama Islam boleh menjadi kenyataan, Dr Mahathir berkata buat masa ini ia tidak mungkin.

"Kita tidak boleh sentimental mengenainya. Sebagai permulaan, dunia Islam mesti belajar berdagang di kalangan mereka.

"Kita mesti memastikan orang kita memahami bahawa dalam perdagangan, masa adalah wang, tetapi sentiasa ada kelewatan dan kerenah birokrasi. Jika kita tidak boleh berdagang di kalangan sendiri, jadi bagaimana kita boleh mempunyai Pasaran Bersama... kita mesti realistik," katanya

Perdana Menteri juga bercakap mengenai sokongan negara-negara Islam kepada rakyat Palestin dalam mencapai hak mereka.

Beliau berkata, satu-satunya bantuan yang boleh diberikan kepada perjuangan rakyat Palestin ialah memberi sokongan yang tidak berbelah bagi kepada mereka.

(END)